

МОНГОЛ УЛСЫН ХУУЛЬ

2022 оны ... дугаар
сарын ...-ны өдөр

Улаанбаатар
хот

АЯЛАЛ ЖУУЛЧЛАЛЫН ТУХАЙ /Шинэчилсэн найруулга/

НЭГДҮГЭЭР БҮЛЭГ НИЙТЛЭГ ҮНДЭСЛЭЛ

1 дүгээр зүйл.Хуулийн зорилт

1.1.Энэ хуулийн зорилт нь үндэсний онцлог бүхий байгаль, түүх, соёлын өвд тулгуурласан тогтвортой аялал жуулчлалын үйлдвэрлэлээр дамжуулан эдийн засгийн үр өгөөжийг нэмэгдүүлж, дэмжих болон аялал жуулчлалын үйл ажиллагаанд төр, иргэн, хуулийн этгээд хооронд үүсэх харилцааг зохицуулахад оршино.

2 дугаар зүйл.Аялал жуулчлалын хууль тогтоомж

2.1.Аялал жуулчлалын хууль тогтоомж нь Иргэний хууль¹, Соёлын өвийг хамгаалах тухай хууль², Засгийн газрын тусгай сангийн тухай хууль³, Тусгай хамгаалалттай газар нутгийн тухай хууль⁴, энэ хууль болон эдгээр хуультай нийцүүлэн гаргасан хууль тогтоомжийн бусад актаас бүрдэнэ.

2.2.Монгол Улсын олон улсын гэрээнд энэ хуульд зааснаас өөрөөр заасан бол олон улсын гэрээний заалтыг дагаж мөрдөнө.

3 дугаар зүйл. Хуулийн нэр томъёоны тодорхойлолт

3.1.Энэ хуульд хэрэглэсэн дараах нэр томъёог доор дурдсан утгаар ойлгоно:

3.1.1.“аялал жуулчлал” гэж хүн өөрийн байнга оршин суудаг газар нутгаасаа нэг хоногоос 90 хоног хүртэлх хугацаагаар суралцах, ажил хөдөлмөр эрхлэхээс бусад зорилгоор өөр газарт аялан явахыг;

3.1.2.“олон улсын аялал жуулчлал” гэж Монгол Улсаас бусад улс руу болон бусад улсаас Монгол Улс руу хийх аялал жуулчлалын үйлчилгээг;

3.1.3.“жуулчин” гэж аялал жуулчлалын байгууллагын бүтээгдэхүүн, үйлчилгээг худалдан авч аялал жуулчлал хийж байгаа Монгол Улсын иргэн, гадаадын иргэн, харьяалалгүй хүнийг;

3.1.4.“аялагч” гэж аяллын зорилгоор аялал жуулчлалын үйлчилгээний байгууллагаар үйлчлүүлж байгаа хүнийг;

¹Иргэний хууль “Төрийн мэдээлэл” эмхэтгэлийн 2002 оны 7 дугаарт нийтлэгдсэн.

²Соёлыг өвийг хамгаалах тухай хууль “Төрийн мэдээлэл” эмхэтгэлийн 2014 оны 23 дугаарт нийтлэгдсэн.

³Засгийн газрын тусгай сангийн тухай “Төрийн мэдээлэл” эмхэтгэлийн 2019 оны 48 дугаарт хэвлэгдсэн.

⁴Тусгай хамгаалалттай газар нутгийн тухай хууль “Төрийн мэдээлэл” эмхэтгэлийн 1997 оны 11 дугаарт хэвлэгдсэн.

3.1.5."аялал жуулчлалын бүтээгдэхүүн, үйлчилгээ" гэж аялал жуулчлалын байгууллагаас жуулчдад санал болгож байгаа аяллын явцад шаардагдах 2, түүнээс дээш бүтээгдэхүүн, үйлчилгээг;

3.1.6."аялал жуулчлалын үйлчилгээний байгууллага" гэж зочид буудал, жуулчны бааз, бусад хэлбэрийн жуулчны байр сууц, тээвэр, хоол үйлдвэрлэл, үйлчилгээ эрхлэгчийг;

3.1.7."тур оператор" гэж аялал жуулчлалын бүтээгдэхүүнийг төлөвлөн бүрдүүлж, багц аяллыг шууд, эсхүл аяллын агентаар дамжуулан худалдах, зохион байгуулах хуулийн этгээдийг;

3.1.8."аяллын агент" гэж тур оператор болон аялал жуулчлалын үйлчилгээний байгууллагаас гаргасан аялал жуулчлалын бүтээгдэхүүнийг жижиглэн, эсхүл хоёр, түүнээс дээш үйлчилгээг худалдан борлуулж байгаа хүн, хуулийн этгээдийг;

3.1.9."жуулчны хөтөч" гэж жуулчинд үндэсний өв соёл, байгаль, газар зүйн онцлог болон шаардлагатай бүхий л мэдээллийг хүргэж аяллыг хөтлөн явуулах энэ хуульд заасан шаардлага хангасан хүнийг;

3.1.10."тусгай сонирхлын аялал жуулчлал" гэж жуулчин, эсхүл жуулчны бүлэгт урлаг, спорт, адал явдал болон танин мэдэхүйн зэрэг тэдний сонирхсон чиглэлээр үзүүлэх аялал жуулчлалын үйлчилгээг.

ХОЁРДУГААР БҮЛЭГ. АЯЛАЛ ЖУУЛЧЛАЛЫН ҮЙЛ АЖИЛЛАГАА

4 дүгээр зүйл.Аялал жуулчлалын үйлдвэрлэл

4.1.Аялал жуулчлалын бүтээгдэхүүн, үйлчилгээг хөгжүүлэх, тэдгээрийг хэрэглэгчдэд хүргэх үйлдвэрлэл, үйл ажиллагаа нь аялал жуулчлалын үндсэн ба дагалдах бүтээгдэхүүн, үйлчилгээнээс бүрдэнэ.

4.2.Аялал жуулчлалын үндсэн бүтээгдэхүүн, үйлчилгээнд дараах үйлчилгээ хамаарна:

- 4.2.1.жуулчныг байр сууцаар хангах үйлчилгээ;
- 4.2.2.зорчигч тээврийн үйлчилгээ;
- 4.2.3.аялал жуулчлалыг зохион байгуулах үйлчилгээ.

4.3.Аялал жуулчлалын дагалдах бүтээгдэхүүн, үйлчилгээнд дараах үйлчилгээ хамаарна:

- 4.3.1.хоол үйлдвэрлэл, үйлчилгээ;
- 4.3.2.аялал жуулчлалын мэдээлэл, зар сурталчилгааны үйлчилгээ;
- 4.3.3.урлаг, үзвэр үйлчилгээ, соёлын бусад үйлчилгээ;
- 4.3.4.худалдаа үйлчилгээ;
- 4.3.5.аялал жуулчлалын гар урлалын бүтээгдэхүүн.

4.4.Төрөөс экспортын үйлдвэрлэлд үзүүлэх дэмжлэг, хөнгөлөлтөд энэ хуулийн 4.2, 4.3-т заасан аялал жуулчлалын байгууллагын гадаадын жуулчинд үзүүлсэн үйлчилгээ нэгэн адил хамаарна.

5 дугаар зүйл.Аялал жуулчлалын байгууллагын ангилал

5.1.Аялал жуулчлалын байгууллага нь аялал жуулчлалын бүтээгдэхүүн, үйлчилгээг жуулчинд үзүүлэх зорилгоор аялал жуулчлалын асуудал эрхэлсэн төрийн захиргааны төв байгууллагад бүртгүүлсэн ашгийн төлөө хуулийн этгээд байна.

5.2.Аялал жуулчлалын байгууллагыг дараах байдлаар ангилна:

5.2.1.тур оператор;

5.2.2.аяллын агент;

5.2.3.аялал жуулчлалын үйлчилгээний байгууллага.

5.3.Тур оператор дараах чиглэлээр үйл ажиллагааг явуулна:

5.3.1.олон улсын аялал жуулчлалын үйл ажиллагаа;

5.3.2.дотоодын аялал жуулчлалын үйл ажиллагаа;

5.3.3.энэ хуулийн 5.3.1, 5.3.2-т заасан үйл ажиллагааг хамтад нь эрхлэх.

5.4.Энэ хуулийн 5.2.1-д заасан хуулийн этгээдийн хувьцааны 51, түүнээс багагүй хувийн хувьцаа эзэмшигч нь Монгол Улсын иргэн, хуулийн этгээд байна.

5.5.Энэ хуулийн 5.2-т заасан ангилалд тусгагдаагүй байгууллага тусгай сонирхлын болон бусад төрлийн эрсдэл бүхий аялал жуулчлалын үйл ажиллагаа эрхлэх тохиолдолд энэ хуулийн 29.1-д заасан нийтийн эрх зүйн хуулийн этгээдэд бүртгүүлсэн байна.

5.6.Тур оператор, аяллын агент нь энэ хуулийн 29.1-д заасан нийтийн эрх зүйн хуулийн этгээдэд бүртгүүлсэн байна.

5.7.Энэ хуулийн 5.2.3-т заасан аялал жуулчлалын үйлчилгээний байгууллагын зэрэглэлийг энэ хуулийн 29.1-д заасан нийтийн эрх зүйн хуулийн этгээдийн саналыг үндэслэн тухайн орон нутгийн аялал жуулчлалын нэгж олгоно.

5.8.Энэ хуулийн 5.2.3-т заасан аялал жуулчлалын үйлчилгээний байгууллагын ангилал, зэрэглэлийг тогтоох, түүнийг олгох, бууруулах, хүчингүй болгох, энэхүү үйл ажиллагаанд авах үйлчилгээний хөлстэй холбоотой журмыг аялал жуулчлалын асуудал эрхэлсэн Засгийн газрын гишүүн батална.

5.9.Энэ хуулийн 5.2.3-т заасан аялал жуулчлалын үйлчилгээний байгууллага нь өөрийн хүлээн авах гадаад жуулчны талаарх мэдээллийг дараах байгууллагад хүргүүлнэ:

5.9.1.гадаадын иргэний асуудал эрхэлсэн төрийн захиргааны байгууллагад 48 цагийн дотор;

5.9.2.харьяалах татварын албанд татварын цахим систем ашиглан 48 цагийн дотор.

5.10. Аялал жуулчлалын байгууллага аялал жуулчлалын бүтээгдэхүүн, үйлчилгээг худалдан борлуулахдаа гадаадын болон дотоодын жуулчдад ялгамжтай байдлаар үнэ тогтоож үйлчлэхийг хориглоно.

5.11. Аялал жуулчлалын байгууллага нь байгаль орчинд сөрөг нөлөөтэй, түүх, соёлын үл хөдлөх дурсгал, хөдлөх дурсгалт зүйлийн бүрэн бүтэн байдал, хэлбэр, шинж чанарыг алдагдуулж, гэмтээх байдлаар аялал жуулчлалын үйл ажиллагаа явуулахыг хориглоно.

6 дугаар зүйл. Тур оператор, түүний эрх, үүрэг

6.1. Тур оператор нь дараах үйл ажиллагааг эрхэлнэ:

6.1.1. аялал жуулчлалын бүтээгдэхүүн, үйлчилгээг төлөвлөх, бүрдүүлэх, бий болгох, сурталчлах, жижиглэнгээр, эсхүл хоёр, түүнээс дээш бүтээгдэхүүн, үйлчилгээг багцлан худалдан борлуулах, аялал зохион байгуулах;

6.1.2. жуулчдад зориулсан соёл, урлаг, олон нийтийн арга хэмжээг зохион байгуулах, борлуулах;

6.1.3. виз авахтай холбогдсон болон аяллын бусад бичиг баримтын бүрдүүлэлт хийх;

6.1.4. агаарын, төмөр замын болон бусад тээврийн хэрэгслээр зорчих билет /тийз/-ийн захиалга хийх, билет /тийз/ худалдах, борлуулах.

6.2. Тур оператор нь дараах үүрэгтэй байна:

6.2.1. Монгол Улсын түүх, ахуй соёл, зан заншлын талаар жуулчдад үнэн зөв, бодит мэдээлэл өгөх;

6.2.2. аялал жуулчлалын мэдээллийн санд өөрийн багц аяллын төрөл, чиглэл, үнэ, хүний нөөц, хөрөнгө оруулалт, үйлчлүүлсэн жуулчид, хамтран ажилладаг аяллын агент, аялал жуулчлалын үйлчилгээний байгууллагын талаарх мэдээллийг өгөх;

6.2.3. аяллыг батлагдсан хөтөлбөрийн дагуу зохион байгуулах, түүнд хяналт тавих, эрсдэлийн менежментийн төлөвлөгөө боловсруулж ажиллах;

6.2.4. байгаль, түүх, соёлын ховор, нэн ховор зүйлсийг хамгаалахад өөрийн зүгээс шаардагдах арга хэмжээ авах, гарсан зөрчлийн талаар холбогдох байгууллагад мэдэгдэх;

6.2.5. мэргэжлийн хариуцлагын даатгалд хамрагдах, жуулчны аюулгүй байдлыг хангах арга хэмжээг авах;

6.2.6. байгаль орчинд сөрөг нөлөөгүй, хүн амын эрүүл мэнд, уламжлалт зан заншилд харшлахгүй аялал жуулчлалын хэлбэрийг хөгжүүлэх;

6.2.7. өөрийн ажилтнуудаа мэргэжлийн сургалт, дамжаанд хамруулж байх;

6.2.8.хуульд заасан бусад.

7 дугаар зүйл.Аяллын агент

7.1.Аяллын агент дараах үйл ажиллагааг эрхэлнэ:

7.1.1.тур операторын бүтээгдэхүүнийг зуучлан худалдах үйл ажиллагаа;

7.1.2.энэ хуулийн 6.1.3, 6.1.4-т заасан үйл ажиллагаа;

7.1.3.хуульд заасан бусад.

7.2.Аяллын агент нь энэ хуулийн 7.1.2-т заасан үйл ажиллагааг эрхлэх бол энэ хуулийн 6.2-т заасан холбогдох үүргийг хүлээнэ.

8 дугаар зүйл.Аялал жуулчлалын үйлчилгээний байгууллага

8.1.Аялал жуулчлалын үйлчилгээний байгууллага нь дараах шаардлагыг хангаж ажиллана:

8.1.1.тухайн үйлчилгээний техникийн зохицуулалтад нийцсэн, чанар, стандартын шаардлагыг хангасан үйлчилгээ үзүүлэх;

8.1.2.үйлчилгээний үнэ тарифыг энэ хуулийн 5.10-т заасныг баримтлан тогтоож үйлчлэх;

8.1.3.үйл ажиллагаандаа мөрдөж байгаа техникийн зохицуулалт, стандарт, үйл ажиллагаагаа явуулахад шаардлагатай бусад мэдээллийг өөрийн албан ёсны цахим хуудас, мэдээллийн самбар, мэдээллийн бусад хэрэгсэл ашиглан нээлттэй, ил тод байршуулах;

8.1.4.аялал жуулчлалын байгууллагатай гэрээ байгуулсан тохиолдолд жуулчнаас үйлчилгээний хөлсийг давхардуулж авахгүй байх;

8.1.5.үйлчилгээний чанарыг сайжруулах зорилгоор таван жилийн дотор зэрэглэлд хамрагдах талаарх бизнес төлөвлөгөөтэй байх.

9 дүгээр зүйл.Жуулчны хөтөч

9.1.Хөтөч, тайлбарлагчийн сургалтад хамрагдаж, энэ хуулийн 29.1-д заасан нийтийн эрх зүйн хуулийн этгээдэд бүртгүүлж, үнэмлэх авсан хүн жуулчны хөтчийн үйлчилгээ үзүүлнэ.

9.2.Жуулчны хөтөч нь дараах эрх, үүрэгтэй байна:

9.2.1.энэ хуульд заасны дагуу олгосон энгэрийн тэмдэг, үнэмлэхийг хэрэглэх;

9.2.2.жуулчдыг үндэсний түүх, соёл, уламжлалын талаар үнэн зөв, бодит мэдээллээр хангах;

9.2.3.аялал жуулчлалын үйлчилгээний ажилтны ёс зүйн дүрмийг дагаж мөрдөх.

9.3.Энэ хуулийн 9.1-д заасан жуулчны хөтчид үнэмлэх олгох, сунгах, түдгэлзүүлэх, хүчингүй болгох, сэргээх журмыг аялал жуулчлалын асуудал эрхэлсэн Засгийн газрын гишүүн батална.

9.4.Тусгай сонирхлын аялал болон уулын спорт аялал, усан аялал, спорт агнуур, олзворын ан, нисдэг тэрэгний аялал, усны гүнд шумбах, авто спортын аялал зэрэг эрсдэл бүхий аяллыг жуулчны хөтчөөс гадна тухайн чиглэлийн мэргэшсэн сургагч багш, зааварлагчтайгаар зохион байгуулна.

10 дугаар зүйл.Жуулчны үйлчилгээ үзүүлэгч иргэний үйл ажиллагаа

10.1.Жуулчны үйлчилгээ үзүүлэгч иргэн нь өөрийн орон нутгийн онцлогийг илэрхийлсэн бэлэг дурсгалын худалдаа, урлаг, соёлын үйлчилгээ болон бусад аялал жуулчлалын дагалдах бүтээгдэхүүн, үйлчилгээг үзүүлэх хүн байна.

10.2.Жуулчны үйлчилгээ үзүүлэгч иргэн хамтран энэ хуулийн 10.1-д заасан үйл ажиллагааг хоршоо, нөхөрлөл хэлбэрээр үзүүлж болно.

10.3.Жуулчны үйлчилгээ үзүүлэгч иргэнд дэмжлэг үзүүлэх, үйлчилгээ үзүүлэхэд тавигдах шаардлагыг аялал жуулчлалын асуудал эрхэлсэн Засгийн газрын гишүүн батална.

11 дүгээр зүйл.Тур операторын үйл ажиллагаа эрхлэх тусгай зөвшөөрөл

11.1.Энэ хуулийн 5.2.1-д заасан тур операторын үйл ажиллагааг Зөвшөөрлийн тухай хуулийн 8.1 дүгээр зүйлийн 1 дэх хэсгийн 1.30 дахь заалтад заасан тусгай зөвшөөрөлтэй эрхэлнэ.

11.2.Энэ хуулийн 11.1-д заасан зөвшөөрөл нь дараах ангилалтай байна:

11.2.1.Монгол Улсаас бусад улс руу хийх аялал жуулчлалын үйлчилгээ;

11.2.2.бусад улсаас Монгол Улс руу хийх аялал жуулчлалын үйлчилгээ;

11.2.3.энэ хуулийн 11.2.1 болон 11.2.2-т заасан аялал жуулчлалын үйлчилгээг хамтад нь эрхлэх;

11.2.4.дотоодын аялал жуулчлалын үйл ажиллагаа.

11.3.Тур операторын үйл ажиллагаа эрхлэхээр хүсэлт гаргасан хуулийн этгээд нь Зөвшөөрлийн тухай хуулийн 5.1 дүгээр зүйлийн 3 дахь хэсэгт заасан баримт бичгээс гадна дараах шаардлагыг хангасан байна:

11.3.1.аяллын агентын чиглэлээр хоёроос доошгүй жил үйл ажиллагаа явуулсан байх;

11.3.2.аялал жуулчлалын салбарын мэдлэг, туршлагатай гурваас доошгүй ажилтантай байх;

11.3.3.аялал жуулчлалын чиглэлээр үйл ажиллагаа явуулах бизнес төлөвлөгөө болон хөдөлмөрийн аюулгүй ажиллагааны журамтай байх;

11.3.4.энэ хуулийн 11.2.1, 11.2.3-т заасан үйл ажиллагаа явуулах тусгай зөвшөөрөл авах тохиолдолд бусад улсын аялал жуулчлалын байгууллагатай хамтран ажиллах боломжтой байх.

11.4.Энэ хуулийн 11.1-д заасан тусгай зөвшөөрлийг олгох, сунгах, түдгэлзүүлэх, хүчингүй болгохдоо Зөвшөөрлийн тухай хуулийн 5.1, 5.2, 5.3, 5.4, 5.5, 5.6, 6.1, 6.2, 6.3, 6.4 дүгээр зүйлд заасан журмыг баримтална.

12 дугаар зүйл.Хил орчмын аялал жуулчлал

12.1.Хил орчмын нутаг дэвсгэрийн аялал жуулчлалыг энэ хуулийн 11.2.1, 11.2.3-т заасан олон улсын аялал жуулчлалын үйлчилгээ үзүүлэх тусгай зөвшөөрөлтэй тур оператор гүйцэтгэнэ.

12.2.Энэ хуулийн 12.1-д заасан тур оператор нь хил орчмын нутаг дэвсгэрийн аюулгүй байдлыг хангах зорилгын хүрээнд улсын хил хамгаалах байгууллагатай гэрээ байгуулж, хэрэгжилтийг хангана.

12.3.Хил орчмын нутаг дэвсгэрийн аялал жуулчлалын үйл ажиллагааг зохион байгуулах журмыг Засгийн газар батална.

Тайлбар: Энэ зүйлд заасан “хил орчмын нутаг дэвсгэр” гэж хил залгаа улстай хиллэж байгаа аймгийн нутаг дэвсгэрийг ойлгоно.

13 дугаар зүйл.Аялал жуулчлалын гэрээ

13.1.Аялал жуулчлалын байгууллага жуулчинтай аялал жуулчлалын гэрээ байгуулахдаа Иргэний хуулийн 370-379 дүгээр зүйлд заасан журмыг баримтална.

13.2.Хууль болон гэрээнд өөрөөр заагаагүй бол жуулчин, аялал жуулчлалын байгууллагын хооронд аялал жуулчлалын гэрээтэй холбогдон гарсан маргааныг энэ хуулийн 29 дүгээр зүйлд заасан Аялал жуулчлалын мэргэжлийн холбоогоор урьдчилан шийдвэрлүүлж болно.

14 дүгээр зүйл.Даатгал

14.1.Тур операторын үйл ажиллагаа эрхлэх тусгай зөвшөөрөл эзэмшигч нь үйл ажиллагаандаа алдаа гаргаж, үйлчлүүлэгчид хохирол учруулсан тохиолдолд түүнийг нөхөн төлөх зорилгоор мэргэжлийн хариуцлагын даатгалд хамрагдана.

14.2.Аяллын агент болон аялал жуулчлалын үйлчилгээний байгууллага нь үйл ажиллагааны төрөл, онцлогоос хамаарч шаардлагатай даатгалд хамрагдаж болно.

14.3.Тусгай сонирхлын аялал болон уулын спорт аялал, усан аялал, спорт агнуур, олзворын ан, нисдэг тэрэгний аялал, усны гүнд шумбах, авто спортын аялал зэрэг эрсдэл бүхий аялал жуулчлалын үйл ажиллагаанд хамрагдах аялагч болон жуулчин нь даатгалд хамрагдана.

15 дугаар зүйл.Жуулчны аюулгүй байдал

15.1.Монгол Улсын нутаг дэвсгэрт аялж байгаа жуулчинд шаардагдах аюулгүй байдлыг аялал жуулчлалын асуудал эрхэлсэн төрийн захиргааны төв байгууллага, цагдаагийн байгууллага хангана.

15.2.Жуулчны аюулгүй байдалд жуулчны хувийн аюулгүй байдал, өмч хөрөнгө болон Хүний хувийн мэдээлэл хамгаалах тухай хуулийн 4.1.11, 4.1.12-т заасан мэдээллийг хадгалах, хамгаалах үйл ажиллагаа хамаарна.

15.3.Жуулчинд бүхий л лавлагаа шатлалын эмнэлэг харьяалал харгалзахгүйгээр эмнэлгийн яаралтай тусламж үйлчилгээ үзүүлнэ.

15.4.Жуулчин эрсдэлт нөхцөл байдалд орсон, сураггүй алга болсон тохиолдолд эрэн хайх, аврах ажиллагааг тухайн орон нутгийн онцгой байдлын алба 12 цагийн дотор эхлүүлнэ.

15.5.Энэ хуулийн 5.2-т заасан аялал жуулчлалын байгууллага нь жуулчдад байгалийн гамшигт үзэгдэл, аливаа гэмтэл, халдварт өвчин, тахал болон шаардлагатай бусад тохиолдолд эмнэлгийн анхан шатны тусламж үзүүлэх бүхий л нөхцөл боломжийг бий болгосон байна.

15.6.Аялал жуулчлалын асуудал эрхэлсэн төрийн захиргааны төв байгууллага нь жуулчдад учирч болзошгүй аюул, халдварт өвчин, тахал болон зорчиход аюултай газар, байршлын жагсаалтыг гарган тур оператор, аяллын агент, аялал жуулчлалын үйлчилгээний байгууллага, жуулчдад мэдэгдэх үүрэгтэй бөгөөд холбогдох мэдээллийг хэвлэл мэдээллийн хэрэгсэл, олон нийтийн цахим сүлжээгээр түгээж, өөрийн албан ёсны цахим хуудсанд байршуулна.

15.7.Жуулчин аяллын явцад эрсдэлт нөхцөлд орсон, гэмт хэргийн хохирогч болсон, гэмт хэрэг, зөрчилд холбогдсон, албадлагын арга хэмжээ авагдсан тохиолдолд аялал жуулчлалын байгууллага тухайн хэрэг, зөрчлийг боломжит богино хугацаанд шийдвэрлүүлэхэд шаардлагатай бүхий л арга хэмжээг авч ажиллана.

15.8.Тур оператор, аяллын агент нь аяллын бүхий л явцад автомат ажиллагаатай дуу-дүрсний бичлэгийн техник, хэрэгслээр тоноглогдсон, стандартын шаардлагад нийцсэн тээврийн хэрэгслээр жуулчдад үйлчилгээ үзүүлнэ.

ГУРАВДУГААР БҮЛЭГ ТӨРӨӨС АЯЛАЛ ЖУУЛЧЛАЛЫГ ДЭМЖИХ

16 дугаар зүйл.Аялал жуулчлалыг хөгжүүлэх сан

16.1.Аялал жуулчлалыг хөгжүүлэх сангийн хөрөнгөөр Засгийн газрын тусгай сангийн тухай хуулийн 21⁴.1-д заасан дараах үйл ажиллагааг санхүүжүүлнэ:

16.1.1.агаарын зорчигч тээврийг нэмэгдүүлэхэд дэмжлэг үзүүлэх;

16.1.2.аялал жуулчлалын улирлын хамаарлыг бууруулах, аялал жуулчлалын шинэ бүтээгдэхүүн үйлчилгээг хөгжүүлэх;

16.1.3.Монгол Улсыг гадаад, дотоодод сурталчлах үйл ажиллагааг зохион байгуулах;

16.1.4.аялал жуулчлалын дэд бүтцийг бий болгох, хөгжүүлэх;

16.2. Аялал жуулчлалыг хөгжүүлэх сан нь аялал жуулчлалын асуудал эрхэлсэн Засгийн газрын гишүүний дэргэд ажиллана.

16.3. Аялал жуулчлалыг хөгжүүлэх сан нь орон тооны бус Удирдах зөвлөл, хяналтын хороотой байх бөгөөд уг Удирдах зөвлөлийн бүрэлдэхүүний 66 хувиас доошгүй хувь нь олон нийтийн мэргэжлийн байгууллагын төлөөлөл байна.

16.4. Энэ хуулийн 16.3-т заасан олон нийтийн мэргэжлийн байгууллагын төлөөлөлд зочид буудал, агаарын тээврийн үйлчилгээ үзүүлэгчдээс тус бүр нэг төлөөлөл, бусад гишүүдийг энэ хуулийн 29.1-д заасан нийтийн эрх зүйн хуулийн этгээдийн төлөөлөл байна.

16.5. Сангийн хөрөнгийг бүрдүүлэх, зарцуулах, гүйцэтгэлийг тайлагнах, хянахтай холбогдсон харилцааг Засгийн газрын тусгай сангийн тухай хуулиар зохицуулна.

17 дугаар зүйл. Амьтан агнах тусгай зөвшөөрөл

17.1. Агнуурын аялал жуулчлалыг дэмжих зорилгоор сүргийн бүтцийг алдагдуулахгүйгээр тооцоо, судалгаанд үндэслэн аргаль, янгир, идлэг шонхор агнах, барих тусгай зөвшөөрлийг дуудлага худалдаагаар олгоно.

17.2. Энэ хуулийн 17.1-д заасан дуудлага худалдаа зохион байгуулах журмыг Засгийн газар батална.

17.3. Энэ хуулийн 17.1-д заасан дуудлага худалдаагаар олгосон эрх, зөвшөөрлийг гуравдагч этгээдэд шилжүүлэх, худалдахыг хязгаарлахгүй.

18 дугаар зүйл. Орон нутгийн аялал жуулчлалын бодлого, менежмент

18.1. Монгол Улсын засаг захиргаа, нутаг дэвсгэрийн нэгж, түүний удирдлагын тухай хуулийн 20.1.5-д заасны дагуу аймаг, нийслэлийн иргэдийн Төлөөлөгчдийн Хурал нь харьяалах нутаг дэвсгэрийн аялал жуулчлалын бодлогыг тодорхойлж, түүний менежментийг зохион байгуулна.

19 дүгээр зүйл. Аялал жуулчлалын тээврийн гарцыг нэмэгдүүлэхийг дэмжих

19.1. Дотоодын болон гадаадын аялал жуулчлалыг хөгжүүлэхээр орон нутгийн нөөц нисэх буудлуудын үйл ажиллагааг сэргээж, эдийн засгийн эргэлтэд оруулах боломжийг төр, хувийн хэвшлийн түншлэлээр хэрэгжүүлнэ.

19.2. Шаардлагатай тохиолдолд дотоодын аялал жуулчлалын тээврийн хүртээмжийг нэмэгдүүлэх зорилгоор хилээр нэвтрүүлж байгаа бага оврын онгоц, нисдэг тэргийг гаалийн татвараас чөлөөлж болно.

19.3. Агаарын тээврийн үйлчилгээний хөлсийг багасгах хүрээнд төрөөс тарифын зохицуулалтыг хийнэ.

20 дугаар зүйл. Аялал жуулчлалын бүс

20.1. Тодорхой газар нутгийг тогтвортой аялал жуулчлалыг хөгжүүлэх зорилгоор гадаадын болон дотоодын хөрөнгө оруулалтыг татах, аялал жуулчлалын бүтээгдэхүүн үйлчилгээг төрөлжүүлэн хөгжүүлэх, орон зайн зохистой төлөвлөлтийг бий болгосон аялал жуулчлалын бүс болгон хөгжүүлж болно.

20.2. Аялал жуулчлалын бүсийг дараах байдлаар ангилна:

20.2.1. улсын аялал жуулчлалын бүс;

20.2.2. орон нутгийн аялал жуулчлалын бүс.

20.3. Энэ хуулийн 20.2.1, 20.2.2-т заасан аялал жуулчлалын бүс нь өөрийн онцлогт тохирсон хөгжлийн төлөвлөгөөтэй байна.

20.4. Энэ хуулийн 20.2.1-д заасан аялал жуулчлалын бүсийн хилийн заагийг тогтоох саналыг аялал жуулчлалын асуудал эрхэлсэн төрийн захиргааны төв байгууллага боловсруулан, газрын асуудал эрхэлсэн төрийн захиргааны төв байгууллагаар баталгаажуулж, газар зохион байгуулалтын мэдээллийн нэгдсэн санд бүртгүүлнэ.

20.5. Энэ хуулийн 20.2.2-т заасан аялал жуулчлалын бүсийн хилийн заагийг аймаг, нийслэлийн аялал жуулчлалын нэгж боловсруулж, аймаг, нийслэлийн иргэдийн Төлөөлөгчдийн Хурал баталж, газар зохион байгуулалтын мэдээллийн нэгдсэн санд бүртгүүлнэ.

20.6. Аялал жуулчлалын бүсийн төлөвлөлт нь тухайн орон нутгийн газар зохион байгуулалтын төлөвлөгөө болон тусгай хамгаалалттай газар нутгийн хамгаалалтын захиргааны менежментийн төлөвлөгөөтэй уялдсан байна.

20.7. Аялал жуулчлалын бүсийн менежментийг бүхэлд нь, эсхүл тодорхой хэсгийг гэрээний үндсэн дээр хуулийн этгээдээр гүйцэтгүүлж болно.

21 дүгээр зүйл. Отоглох цэг

21.1. Тухайн бүс нутагт орчны бохирдол бий болохоос урьдчилан сэргийлэх, аялал жуулчлалыг зохистой зохион байгуулах, аялагчдын тав тухтай аялах орчин нөхцөлийг бүрдүүлэх зорилгоор отоглох цэгийг байгуулж болно.

21.2. Отоглох цэг байгуулах шийдвэрийг тухайн орон нутгийн Аялал жуулчлалын асуудал эрхэлсэн газрын саналыг үндэслэн аймаг, нийслэлийн Засаг дарга гаргана.

21.3. Энэ хуулийн 21.1-д заасан отоглох цэг нь Тусгай хамгаалалтын газар нутагт байрлах тохиолдолд Тусгай хамгаалалтын газар нутгийн тухай хуулийн 30.6-д заасны дагуу тухайн тусгай хамгаалалттай газар нутгийн хамгаалалтын захиргаа отоглох цэгийг байгуулна.

21.4. Отоглох цэгийн менежмент, өдөр тутмын үйл ажиллагаа, арчилгаа, үйлчилгээ, хог хаягдлын менежментийг тухайн орон нутгийн сум, дүүргийн захиргаа, эсхүл тухайн отоглох цэг нь Тусгай хамгаалалттай газар нутагт байрлах тохиолдолд Тусгай хамгаалалттай газар нутгийн хамгаалалтын захиргаа тус тус хариуцна.

21.5. Отоглох цэгийн менежментийг гэрээний үндсэн дээр хуулийн этгээдээр гүйцэтгүүлж болно.

21.6. Отоглох цэгт олон нийтийн аюулгүй байдлыг хангах харилцааг Цагдаагийн албаны тухай хуулиар зохицуулна.

21.7.Энэ хуулийн 21.1-д заасан отоглох цэг нь стандартын шаардлага хангасан ариун цэврийн байгууламжтай байна.

Тайлбар:Энэ хуулийн 21 дүгээр зүйлд заасан “отоглох цэг” гэж машины зогсоол, майхан барих, ил гал түлэх тусгай талбай, ариун цэврийн байгууламж, хогийн цэг, гэрэлтүүлэг, сандал, саравч, бүхий цогц орчныг ойлгоно.

ДӨРӨВДҮГЭЭР БҮЛЭГ АЯЛАЛ ЖУУЛЧЛАЛЫН ТАЛААР ТӨРИЙН БОЛОН НУТГИЙН ӨӨРӨӨ УДИРДАХ БАЙГУУЛЛАГЫН БҮРЭН ЭРХ

22 дугаар зүйл.Улсын Их Хурлын бүрэн эрх

22.1.Улсын Их Хурал аялал жуулчлалын талаар төрөөс баримтлах нэгдсэн бодлогыг тодорхойлно.

23 дугаар зүйл.Засгийн газрын бүрэн эрх

23.1.Засгийн газар аялал жуулчлалын талаар дараах бүрэн эрхийг хэрэгжүүлнэ:

23.1.1.аялал жуулчлалын талаар төрийн бодлого, хууль тогтоомжийн хэрэгжилтийг зохион байгуулах;

23.1.2.аялал жуулчлалыг хөгжүүлэх Үндэсний хороог байгуулах;

23.1.3.бүс нутгийг хамарсан аялал жуулчлалын олон улсын төсөл, арга хэмжээг хэрэгжүүлэх шийдвэр гаргах;

23.1.4.аялал жуулчлалын салбарт гадаад, дотоодын хөрөнгө оруулалтыг дэмжих, зохистой харилцааг бий болгох;

23.1.5.энэ хуулийн 12.3, 17.2-т заасан журмыг батлах;

23.1.6.Монгол Улсын аялал жуулчлалыг сурталчлах, хүний нөөцийг бэлтгэх, аялал жуулчлалын төрөлжсөн мэдээллээр хангах ажлыг зохион байгуулах;

23.2.Энэ хуулийн 23.1.2-т заасан аялал жуулчлалыг хөгжүүлэх Үндэсний хороо /цаашид “Үндэсний хороо” гэх/ дараах бүрэн эрхийг хэрэгжүүлнэ:

23.2.1.аялал жуулчлалыг хөгжүүлэх бодлого боловсруулах;

23.2.2.Монгол Улсын аялал жуулчлалыг бусад улсад сурталчлах үйл ажиллагааг нэгдсэн зохион байгуулалтаар удирдах;

23.2.3.аялал жуулчлалын салбарт шинэчлэлт, өөрчлөлтийг нэвтрүүлэх;

23.2.4.аялал жуулчлалын салбар дундын үйл ажиллагааг уялдуулан зохицуулах, нэгдсэн удирдлагаар хангах.

23.2.5.аялал жуулчлалын асуудал эрхэлсэн төрийн захиргааны төв байгууллагын саналыг үндэслэн энэ хуулийн 20.2.1-д заасан улсын аялал жуулчлалын бүсийг тогтоох;

23.2.6.иргэний нисэхийн асуудал эрхэлсэн төрийн захиргааны төв байгууллагын саналыг үндэслэн агаарын зорчигч тээврийг нэмэгдүүлэхэд дэмжлэг үзүүлэх.

23.3.Үндэсний хороо нь дарга, төсөв, санхүү, аялал жуулчлал, хууль зүй, соёлын асуудал эрхэлсэн төрийн захиргааны төв байгууллагаас санал болгосон тус бүр нэг, энэ хуулийн 29.1-д заасан нийтийн эрх зүйн хуулийн этгээдээс санал болгосон гурван гишүүнээс тус тус бүрдэнэ.

23.4.Үндэсний хороог Ерөнхий сайд тэргүүлэх бөгөөд хорооны гишүүдийг томилж, чөлөөлнө.

23.5.Үндэсний хорооны ажиллах журмыг Засгийн газар батална.

24 дүгээр зүйл.Аялал жуулчлалын асуудал эрхэлсэн төрийн захиргааны төв байгууллагын бүрэн эрх

24.1.Аялал жуулчлалын асуудал эрхэлсэн төрийн захиргааны төв байгууллага аялал жуулчлалын талаар дараах бүрэн эрхийг хэрэгжүүлнэ:

24.1.1.энэ хуулийн 5.8, 9.3, 10.3-т заасан журмыг батлах;

24.1.2.аялал жуулчлалын салбарын ажилтны ёс зүйн дүрмийг батлах;

24.1.3.тусгай сонирхлын аялал жуулчлалын үйл ажиллагааг зохицуулах журмыг батлах;

24.1.4.аялал жуулчлалыг хөгжүүлэх чиглэлээр улсын болон олон улсын хэмжээнд аялал жуулчлалын байгууллага хоорондын үйл ажиллагааг уялдуулан зохицуулах, хамтран ажиллах;

24.1.5.аялал жуулчлалын мэргэжлийн сургалт, эрдэм шинжилгээний ажлыг хөгжүүлэх чиглэлээр холбогдох иргэн, хуулийн этгээдтэй хамтран ажиллах, дэмжлэг үзүүлэх;

24.1.6.аялал жуулчлалын бүсийн нөөц, даацыг тогтоох, аялал жуулчлалын бүс нутагт үйл ажиллагаа явуулах жуулчны үйлчилгээний байгууллагын тоо, байршлыг тогтоох, тэдгээрийн нэгдсэн бүртгэлийг хөтлөх;

24.1.7.Монгол Улсыг сурталчлах ажлыг зохион байгуулах, санхүүжилтийг холбогдох хууль тогтоомжийн дагуу шийдвэрлэх;

24.1.8.аялал жуулчлалын үйлдвэрлэл, үйлчилгээ, ажлын байрыг нэмэгдүүлэх бодлого боловсруулах;

24.1.9.аялал жуулчлалын үйлчилгээний салбарт олон улсын стандартыг нэвтрүүлж буй аялал жуулчлалын байгууллагыг бодлогоор дэмжих;

24.1.10.дотоодын аялал жуулчлалыг хөгжүүлэх бодлого боловсруулах;

24.1.11.энэ хуулийн 20.2.1-д заасан улсын аялал жуулчлалыг бүсийг тогтоох саналыг Үндэсний хороонд хүргүүлэх.

25 дугаар зүйл.Аймаг, нийслэлийн иргэдийн Төлөөлөгчдийн Хурлын бүрэн эрх

25.1.Аймаг, нийслэлийн иргэдийн төлөөлөгчдийн хурал аялал жуулчлалын талаар дараах бүрэн эрхийг хэрэгжүүлнэ:

25.1.1.газар нутагтаа аялал жуулчлалын талаарх төрийн бодлого, хууль тогтоомжийн биелэлтэд хяналт тавих, Засаг даргын тайланг хэлэлцэх;

25.1.2.газар нутгийнхаа тодорхой хэсгийг аялал жуулчлалын бүс болгон хөгжүүлэх саналаа аялал жуулчлалын асуудал эрхэлсэн төрийн захиргааны төв байгууллагад хүргүүлэх;

25.1.3.жуулчин болон аялагч отоглох цэгт байрлах хураамжийн хэмжээг тогтоох.

25.2.Аялал жуулчлалын хөгжил, бүс нутгийн онцлогоос хамааран дүүрэг, сумдад аялал жуулчлалын асуудал хариуцсан нэгж байгуулан ажиллаж болно.

26 дугаар зүйл.Аймаг, нийслэлийн Засаг даргын бүрэн эрх

26.1.Аялал жуулчлалын талаар аймаг, нийслэлийн Засаг дарга дараах бүрэн эрхийг хэрэгжүүлнэ:

26.1.1.аялал жуулчлалыг хөгжүүлэх талаар төрөөс баримтлах бодлого, зорилтот хөтөлбөрийн хэрэгжилтийг хангах;

26.1.2.аялал жуулчлалын тухай хууль тогтоомж, холбогдох бусад хууль, дүрэм, журам, техникийн нөхцөл, стандартын хэрэгжилтийг хангуулах;

26.1.3.газар нутагтаа аялал жуулчлалын дэд бүтцийг хөгжүүлэх;

26.1.4.газар нутагтаа аялал жуулчлалыг бүсчлэн хөгжүүлэх бодлоготой уялдуулан төлөвлөгөө боловсруулах, зохих шатны иргэдийн Төлөөлөгчдийн Хуралд санал оруулах, батлагдсан хөтөлбөрийн дагуу аялал жуулчлалын төлөвлөгөө боловсруулж хэрэгжүүлэх;

26.1.5.эрх хэмжээнийхээ хүрээнд газар нутагтаа газар зохион байгуулалтын төлөвлөгөөнд үндэслэн аялал жуулчлалын зориулалтаар газар ашиглах зөвшөөрлийг хууль тогтоомжийн дагуу олгож гэрээ байгуулах;

26.1.6.аялал жуулчлалын мэдээллийн санг хөтлөх;

26.1.7.аймаг, нийслэлийн хэмжээнд зохион байгуулагддаг наадам, бусад аялал жуулчлалын арга хэмжээний товыг тухайн жилийн 10 дугаар сарын 1-нээс өмнө зарлах, тэдгээр арга хэмжээг зохион байгуулах, удирдлагаар хангах;

26.1.8.аялал жуулчлалын мэдээллийн санд холбогдох мэдээллийг хүргүүлэх, хадгалах, хамгаалах;

26.1.9.улсын нэгдсэн зохион байгуулалтаар болон улсын аялал жуулчлалын замналын дагуу гүйцэтгэж байгаа аялал жуулчлалын бүтээн байгуулалтын үйл ажиллагаанд дэмжлэг үзүүлэх;

26.1.10.орон нутгийн аялал жуулчлалын өрсөлдөх чадварыг нэмэгдүүлэх арга хэмжээ авах;

26.1.11.энэ хуулийн 21 дүгээр зүйлд заасан отоглох цэгийн арчилгаа, үйлчилгээ, хог хаягдлын менежментийг харьяалах нутаг дэвсгэрийн аялал жуулчлалын асуудал эрхэлсэн төрийн захиргааны байгууллагаар гүйцэтгүүлэх, эсхүл отоглох цэгийн менежментийг гүйцэтгүүлэх шийдвэр гаргах;

26.1.12.харьяалах нутаг дэвсгэртээ жуулчны мэдээллийн төв байгуулах.

Тайлбар:Энэ хуулийн 26.1.12-т заасан “жуулчны мэдээллийн төв” гэж жуулчдад шаардлагатай байр зүйн зураг, холбогдох бусад мэдээллийг хэвлэмэл болон цахим хэлбэрээр хүргэх мэдээллийн үйлчилгээний цэгийг ойлгоно.

27 дугаар зүйл.Сум, дүүргийн иргэдийн Төлөөлөгчдийн Хурлын бүрэн эрх

27.1.Сум, дүүргийн иргэдийн Төлөөлөгчдийн Хурал аялал жуулчлалын талаар дараах бүрэн эрхийг хэрэгжүүлнэ:

27.1.1.энэ хуулийн 20.2.1, 20.2.2-т заасан аялал жуулчлалын бүсийг хөгжүүлэхэд дэмжлэг үзүүлэх;

27.1.2.нутаг дэвсгэрийн тодорхой хэсгийг аялал жуулчлалын бүс болгон хөгжүүлэх саналаа аймаг, нийслэлийн иргэдийн Төлөөлөгчдийн Хуралд хүргүүлэх;

27.1.3.хуульд заасан бусад.

28 дугаар зүйл.Сум, дүүргийн Засаг даргын бүрэн эрх

28.1.Сум, дүүргийн Засаг дарга аялал жуулчлалын талаар дараах бүрэн эрхийг хэрэгжүүлнэ:

28.1.1.газар нутагтаа аялал жуулчлалын арга хэмжээг зохион байгуулах, орон нутгаа сурталчлах;

28.1.2.сум, дүүргийн соёл, спорт, олон нийтийн арга хэмжээг аялал жуулчлалын үйл ажиллагаатай уялдуулан зохион байгуулах, дэмжлэг үзүүлэх;

28.1.3.сум, дүүргийн аялал жуулчлалын мэдээллийн сан бүрдүүлэх, хадгалах, хамгаалж жил бүрийн 01-р сарын 15-ны өдрөөс өмнө аялал жуулчлалын мэдээллийн санд холбогдох мэдээллийг хүргүүлэх;

28.1.4.аялал жуулчлалын үйлчилгээ үзүүлэгч иргэний үйл ажиллагааг хөгжүүлэхэд дэмжлэг үзүүлэх;

28.1.5.жуулчны аюулгүй байдлыг хангах арга хэмжээг харьяалах нутаг дэвсгэрийн цагдаагийн байгууллага, нутгийн иргэдтэй хамтран зохион байгуулах, хэрэгжилтэд хяналт тавих;

28.1.6.орон нутгийн иргэдийн өв соёлын үнэт зүйлс, гар урлал, уламжлалт соёлыг аялал жуулчлалын бүтээгдэхүүн болгон хөгжүүлэх зорилгоор орон нутаг аялал жуулчлалын хөрөнгө оруулалтыг татах нөхцөлийг хангах;

28.1.7.харьяалах нутаг дэвсгэрийн аялал жуулчлалын мэдээллийн санг бүрдүүлэх, хадгалах, хамгаалах, заасан хугацаанд аймаг, нийслэлийн эрх бүхий байгууллагад хүргүүлэх;

28.1.8.харьяалах нутаг дэвсгэртээ отоглох цэгийн байршил, аяллын маршрутыг тогтоох, нэгдсэн хаягжуулалтыг бий болгох.

28.1.9.энэ хуулийн 25.1.3-т заасан хураамжийн орлогыг аялал жуулчлалын бүсийг тохижуулах, ариун цэврийн байгууламж байгуулах, хог хаягдлын менежментийг гүйцэтгэхэд зарцуулах.

29 дүгээр зүйл. Аялал жуулчлалын мэргэжлийн холбоо

29.1. Аялал жуулчлалын мэргэжлийн холбоо /цаашид “Холбоо” гэх/ нь тур оператор, аяллын агент, аялал жуулчлалын үйлчилгээний байгууллагын нэгдэл бүхий, аялал жуулчлалын үйлдвэрлэл, үйл ажиллагаанд оролцогчдыг сургалт, зөвлөгөө, мэдээлэл, мэргэжлийн арга зүйгээр хангах, аялал жуулчлалын үйлдвэрлэл, үйл ажиллагаанд баримтлах мэргэжлийн ёс зүйн дүрмийг батлах, боловсронгуй болгох үндсэн чиг үүрэг бүхий ашгийн бус, нийтийн эрх зүйн хуулийн этгээд байна.

29.2. Энэ хуулийн 5.2.1-д заасан тур операторын үйл ажиллагаа эрхлэх тусгай зөвшөөрөлтэй хуулийн этгээд нь Холбооны гишүүнчлэлд хамрагдах үүрэгтэй.

29.3. Холбооны дүрэм, удирдлагын бүтэц, үйл ажиллагааны журам, санхүүжилт зэрэг зохион байгуулалтын бусад асуудлыг бүх гишүүдийн хурлаар бие даан шийдвэрлэнэ.

29.4. Холбоо нь улс орны аялал жуулчлалын салбарын хөгжлийн талаар баримтлах төрийн бодлого, зохицуулалтад мэргэжлийн зөвлөгөө өгөх, салбарын мэргэжилтнүүдийн мэргэжлийн ур чадварыг нэмэгдүүлэх, соён гэгээрүүлэх чиглэлээр төрийн, төрийн бус болон олон улсын байгууллагуудтай хамтран ажиллаж болно.

29.5. Холбоо нь тухайн жилийн үйл ажиллагааны тайлангаа дараа оны 4 дүгээр сарын 01-ний өдрийн дотор аялал жуулчлалын асуудал эрхэлсэн төрийн захиргааны төв байгууллагад хүргүүлж, олон нийтэд нээлттэй мэдээлнэ.

29.6. Энэ хуулийн 5.8-д аялал жуулчлалын үйлчилгээний байгууллагын зэрэглэл олгох, 9 дүгээр зүйлд заасан жуулчны хөтчид үнэмлэх олгох, бүртгэх, 11 дүгээр зүйлд заасан тур операторын тусгай зөвшөөрөл олгох чиг үүргийг Холбоогоор гүйцэтгүүлж болно.

30 дугаар зүйл. Мэдээллийн сан

30.1. Аялал жуулчлалын салбарын эдийн засагт үзүүлж байгаа өсөлтийг тодорхойлох, аялал жуулчлалын судалгаа, шинжилгээ, статистик мэдээллийг хөгжүүлэх зорилго бүхий аялал жуулчлалын мэдээллийн сан байна.

30.2. Энэ хуулийн 30.1-д мэдээллийн сан нь дараах мэдээллээс бүрдэнэ:

30.2.1. аяллын маршрутын мэдээлэл;

30.2.2. гадаадын болон дотоодын аялагч болон жуулчны бүртгэл, мэдээлэл;

30.2.3. аялал жуулчлалын байгууллагын бүртгэл, мэдээлэл;
30.2.4. энэ хуулийн 20 дугаар зүйлд заасан аялал жуулчлалын бүсийн мэдээлэл;

30.2.5. энэ хуулийн 21 дүгээр зүйлд заасан отоглох цэгийн мэдээлэл;
30.2.6. энэ хуулийн 15.6-д заасан жуулчдад учирч болзошгүй аюул, халдварт өвчин, тахал болон зорчиход аюултай газар, байршлын жагсаалтын мэдээлэл.

30.3. Энэ хуулийн 30.2-т заасан мэдээлэлтэй жуулчин цахим сүлжээгээр дамжуулан танилцах боломжтой байна.

30.4. Энэ хуулийн 30.1-д заасан цахим санг бүрдүүлэх, ашиглах үйл ажиллагааг аялал жуулчлалын асуудал эрхэлсэн төрийн захиргааны төв байгууллага эрхэлнэ.

30.5. Энэ хуулийн 30.1-д заасан цахим санг бүрдүүлэх, ашиглах, баяжуулах журмыг аялал жуулчлал асуудал эрхэлсэн Засгийн газрын гишүүн батална.

ТАВДУГААР БҮЛЭГ

АЯЛАЛ ЖУУЛЧЛАЛЫН ҮЙЛ АЖИЛЛАГААНД ТАВИХ ХЯНАЛТ

31 дүгээр зүйл. Аялал жуулчлалын үйл ажиллагаанд тавих хяналт

31.1. Аялал жуулчлалын үйл ажиллагаанд тавих хяналт нь дараах төрөлтэй байна:

31.1.1. аялал жуулчлалын үйл ажиллагаанд тавих төрийн хяналт;

31.1.2. аялал жуулчлалын үйл ажиллагаанд тавих олон нийтийн хяналт.

31.2. Аялал жуулчлалын тухай хууль тогтоомжийн биелэлтэд аялал жуулчлалын асуудал эрхэлсэн төрийн захиргааны төв байгууллага, бүх шатны Засаг дарга эрх хэмжээнийхээ хүрээнд хяналт тавина.

31.3. Аялал жуулчлалын асуудал хариуцсан төрийн захиргааны төв байгууллага, орон нутгийн аялал жуулчлалын асуудал эрхэлсэн захиргааны байгууллага, нэгж нь бүх шатандаа аялал жуулчлалын нөөцийг хамгаалах, бүрдүүлэх, зүй зохистой ашиглахад хяналт тавина.

31.4. Аялал жуулчлалын асуудал эрхэлсэн засгийн газрын гишүүн нь төрөөс аялал жуулчлалын үйл ажиллагаанд тавих хяналтын улсын ерөнхий байцаагч байх бөгөөд улсын ахлах байцаагч, улсын байцаагч, орон нутаг дахь улсын байцаагчийг томилж, чөлөөлнө.

31.5. Аялал жуулчлалын тухай хууль тогтоомжийн биелэлтэд тавих хяналтыг аялал жуулчлалын асуудал эрхэлсэн төрийн захиргааны төв байгууллага, аймаг, нийслэлийн аялал жуулчлалын нэгж, аялал жуулчлалын улсын байцаагч нар хамтран хэрэгжүүлнэ.

31.6. Энэ зүйлд заасан аялал жуулчлалын үйл ажиллагаанд тавих төрийн хяналтыг энэ хуулийн 29.1-д заасан нийтийн эрх зүйн хуулийн этгээдэд шилжүүлж болно.

32 дугаар зүйл. Аялал жуулчлалын үйл ажиллагаанд тавих олон нийтийн хяналт

32.1. Аялал жуулчлалын үйл ажиллагаанд тавих олон нийтийн хяналтыг хэрэгжүүлэх талаар иргэн, хуулийн этгээд дараах эрх эдэлнэ:

32.1.1. аялал жуулчлалын тухай хууль тогтоомжийг зөрчсөн тухай мэдээлэх, өргөдөл, гомдлыг харьяалах Аялал жуулчлалын асуудал эрхэлсэн төрийн захиргааны байгууллагад гаргаж, шийдвэрлүүлэх;

32.1.2. аялал жуулчлалын хууль тогтоомж зөрчигдсөнтэй холбоотойгоор учирсан хохирлыг арилгуулахаар харьяалах шүүхэд нэхэмжлэл гаргах.

33 дугаар зүйл. Хууль зөрчигчид хүлээлгэх хариуцлага

33.1. Энэ хуулийг зөрчсөн албан тушаалтны үйлдэл нь гэмт хэрэг, зөрчлийн шинжгүй бол Төрийн албаны тухай, Хөдөлмөрийн тухай хуульд заасан хариуцлага хүлээлгэнэ.

33.2. Энэ хуулийг зөрчсөн хүн, хуулийн этгээдэд Эрүүгийн хууль, эсхүл Зөрчлийн тухай хуульд заасан хариуцлага хүлээлгэнэ.

34 дүгээр зүйл. Шилжилтийн үеийн зохицуулалт

34.1. Энэ хуулийн 5 дугаар зүйлийн 5.9 дэх хэсгийг 2023 оны 06 дугаар сарын 01-ний өдрөөс дагаж мөрдөнө.

34.2. Энэ хуулийн 11 дүгээр зүйлийн 11.3.1 дахь заалтыг 2025 оны 01-р сарын 01-ний өдрөөс эхлэн дагаж мөрдөнө.

34.3. Энэ хуулийн 12 дугаар зүйлийн 12.1 дэх хэсгийг 2024 оны 01-р сарын 01-ний өдрөөс эхлэн дагаж мөрдөнө.

35 дугаар зүйл. Хууль хүчин төгөлдөр болох

35.1. Энэ хуулийг 2023 оны __ дугаар сарын __-ны өдрөөс эхлэн дагаж мөрдөнө.

Гарын үсэг